

दिनांक 18.08.2024

समय: 18.45 बजे

आकाशवाणी जयपुर-अजमेर

प्रादेशिक समाचार

- मुख्यमंत्री भजन लाल शर्मा कह्या-प्रदेश मांय मोट्यारां ने चोखी शिक्षा रे साथै रूजगार मुहैया करणो सरकार रो पैलो काम है।
- एक सितम्बर सुं भारतीय जनता पार्टी देशभर मांय सदस्यता अभियान चलावेला।
- प्रदेश मांय रेजीडेंट अर निजी डॉक्टरां री हड़ताल खतम होबा रे पछे चिकित्सा सेवावां सामान्य व्हे री है।

अर

- रक्षा बंधन रा त्योहार माथे महिलावां ने राज्य सरकार दी सौगात-आधी रात सुं रोड़वेज बसां मांय मुफ्त यात्रा री सुविधा मिलेला।

000

मुख्यमंत्री भजनलाल शर्मा कह्या के प्रदेश रा हर एक मोट्यार ने चोखी शिक्षा रे साथै रूजगार रा मौका मुहैया करणो म्हाको पैलो काम है। श्री शर्मा आज सीकर री एक शिक्षण संस्थान मांय पंडित हरिनाथ चतुर्वेदी अर संत शिरोमणि मकड़ीनाथ जी महाराज री मूर्ति रा अनावरण जळसा ने सम्बोधित कर रह्या हा। वे कह्या के मोट्यारा रे सागे धोखो करबा वाळा किणी भी अपराधी ने छोड्यो नी जावेला। मुख्यमंत्री कह्या के सरकारी परीक्षावां मांय पूरी सावचेती रे साथै इण बरस एक लाख भर्तियां रा लगस रे साथै आवता पांच बरस मांय 4 लाख भर्तियां करी जावेला। राज्य सरकार आवता पांच बरस मांय निजी हलका रे साथै मिल र कुल 10 लाख रूजगार रा मौका बणावेला। श्री शर्मा कह्या के बजट मांय सीकर जिला ने केई सौगाता दी गई है। साथै ही तीस बरसा सुं लम्बित यमुना जल समझौता ने पूरा कर्यो गयो है। मुख्यमंत्री कह्या के इण बरस राज्य सरकार बिजली अर पाणी माथे खास ध्यान दियो है।

.....

000

उपराष्ट्रपति जगदीप धनखड़ आज जयपुर मांय 'देह—दान करबा वाळां परिवारां रो सम्मान कर्या। दधीची देहदान समिति कानी ऊं राख्या कार्यक्रम मांय 254 देहदानी परिवार अर शरीर दान करबा वाळां 23 दानियां रा परिवारां रो सम्मान कर्यो गयो। कार्यक्रम मांय उपमुख्यमंत्री प्रेमचन्द बैरवा अर विधानसभा अध्यक्ष वासुदेव देवनानी रे अलावा केन्द्रीय सड़क अर परिवहन राज्यमंत्री हर्ष मल्होत्रा भी मौजूद रह्या। उपराष्ट्रपति आज सुं प्रदेश री दो दिन री यात्रा माथे है।

000

केन्द्रीय उपभोक्ता संरक्षण प्राधिकरण— सी.सी.पी.ए. कोचिंग संस्थान श्रीराम्स आई.ए.एस. माथे यूपी.एस.सी. री सिविल सेवा परीक्षा 2022 रा नतीजा रा बारा मांय फर्जी अर भ्रामक विज्ञापन प्रकाशित करबा माथे तीन लाख रूप्या रो जुर्मानो लगायो है। उपभोक्ता मामलां, खाद्य अर सार्वजनिक वितरण मंत्रालय कह्यो के यो फैसलो उपभोक्ता अधिकारां रा संरक्षण अर प्रोत्साहन खातर लियो गयो है। इण सुं वस्तु या सेवा मांय फर्जी या भ्रामक विज्ञापन रोकाबा मांय मदद मिलेला।

उपभोक्ता संरक्षण अधिनियम 2019 रा प्रावधानां री अणदेखी बाबत् सी.सी.पी.ए. री प्रमुख मुख्य आयुक्त निधि खरे अर आयुक्त अनुपम मिश्रा श्रीराम्स आई.ए.एस. रा भ्रामक विज्ञापन ने बेगी ही रोकबा रा आदेश दिया है। श्रीराम्स आई.ए.एस. विज्ञापन मांय दावो कर्यो है के उण री संस्थान रा दो सौ सुं बत्ता उम्मीदवारां रो चुणाव व्हयो है। जद के या संख्या एक सौ 71 ही।

000

भारतीय जनता पार्टी 1 सितम्बर सुं देशभर मांय सदस्यता अभियान चलावेला। भाजपा पदाधिकारियां री नुवी दिल्ली मांय व्ही बैठक रे पछे पार्टी प्रवक्ता संबित पात्रा बताया के इण अभियान रा लगस 10 करोड़ सुं बत्ता पार्टी रा सदस्यां ने जोडनो है। वे कह्या के जिण राज्यां मांय चुणाव रो ऐलान व्हयो है वठे विधानसभा चुणावां रे पछे सदस्यता अभियान सरू व्हेला। श्री पात्रा कह्या के मिस्ट्र कॉल, क्यूआर कोड, नमो एप अर भाजपा री वेबसाइट रे जरिये नुवा सदस्य जोड्या जावेला। श्री पात्रा कह्या के इण अभियान रो लगस पार्टी रो आधार बढ़ार उण री विचारधारा रो प्रचार करणो है। बैठक री अध्यक्षता पार्टी अध्यक्ष जगत प्रकाश नड्डा करी। इण बैठक मांय पार्टी रा आला नेता शामिल व्ह्या। ई बीच सदस्यता अभियान ने ले र भाजपा प्रदेशाध्यक्ष मदन राठौड आज जयपुर मांय पार्टी पदाधिकारियां री बैठक ली। भाजपा सदस्यता अभियान खातर पैली रा प्रदेश अध्यक्ष अरुण चतुर्वेदी ने संयोजक बणायो है। भाजपा प्रदेश अध्यक्ष मदन राठौड बताया के राज्य रा 51 हजार बूथां माथे 200—200 सदस्य बणाया जावेला।

000

प्रदेश मांय रेजीडेन्ट डॉक्टर अर निजी डॉक्टरां री 24 घंटा री हड़ताल रे पछे आज चिकित्सा सेवावां फ़ैरू बाहल व्हे गयी। हालांकि आज भी कुछ सफाखाना मांय डॉक्टर काळी पट्टी बांध र विरोध जताया। कुछ एक ठौड़ां माथे केंडल मार्च अर श्रद्धाजंलि सभावां राखी गयी। दूजी कानी आज बत्ता सफाखाना मांय ओपीडी आईपीडी अर इमरजेंसी समेत सगळी जरूरी सेवावां सरू व्हे गयी। चिकित्सा मंत्री गजेन्द्र सिंह खींवसर जयपुर रा सवाईमानसिंह सफाखाना मांय व्यवस्थावां रो जायजो कर्या अर अहलकारां ने जरूरी निर्देश दिया। वणा राजधानी रा दूजा सफाखानां रो दौरा कर

चिकित्सा सेवावां रो जायजो कर्यो। चिकित्सा मंत्री कह्या के व्यवस्थावां ने जारी राखबा खातर जरूरी इन्तजाम कर्या गया है। इण बीच कोलकाता मांय महिला डॉक्टर रे सागे दुष्कर्म अर फेर हत्या रा मामला मांय सीबीआई जांच चाल री है। इंडियन मेडिकल एसोसिएशन इण मामला मांय प्रधानमंत्री नरेन्द्र मोदी सुं दखलअंदाजी करण री मांग करी है जिण सुं स्वास्थ्य कर्मियां री हिफाजत खातर केंद्रीय कानून लायो जा सके।

000

काल संस्कृत दिवस मनायो जावेला। यो दिन दुनिया री सबऊं पुरानी भाषावां मांय सुं एक संस्कृत रा बत्ता प्रचार-प्रसार अर लोगां मांय इ खातर जाग जगावण सारु मनायो जावे है। राज्यपाल हरिभाऊ बागडे संस्कृत दिवस माथे प्रदेशवासियां ने बधाई अर शुभकामनावां दी। वे कह्या के संस्कृत भाषा नी है बल्कि आपा रा देश री गौरव वाळी संस्कृति है। श्री बागडे संस्कृत दिवस री पैली री सिंज्यां माथे आज आकाशवाणी माथे अबु ऊं थोड़ी देर पछे सम्बोधित करेला।

000

भाई बहन रा प्रेम रो प्रतीक तिवार राखी काल मनायी जावेला। ई सुं पैली आज बाजारां मांय राखीयां अर मिठाई खरीदबा खातर भीड़ देखी जा री है। राजधानी जयपुर मांय छुट्टी रे दिन आज बाजारां मांय खासी रौनक बण्योड़ी है। राखी माथे राजस्थान रोडवेज री कानी ऊं महिलावां ने मुफ्त यात्रा री सौगात दीरीजी है। आज आधी रात सुं प्रदेश री सीमा मांय वोल्वो अर एसी बसां ने छोड र सगळी रोडवेज बसां मांय महिलावां रो सफर मुफ्त रैवेला। वठिने सीमा माथे तैनात जवानां ने राखी बांधबा जयपुर सुं रवाना व्हयो महिलावां रो दळ उत्तर काशी मांय आईटीबीपी जवानां ने राखी बांधी अर शुभकामनावां दी। दूजी कानी जैसलमेर मांय राखी रा पावन पर्व माथे जवाहर जिला सफाखाना मांय भर्ती सगळी महिला रोगियां ने जरूरत होबा माथे बगैर रिप्लेसमेंट रे खून मुहैया करयो जावेला। डूंगरपुर समेत प्रदेश री वीरांगनावां ने मुख्यमंत्री भजन लाल शर्मा इण बगत रक्षा बंधन संदेश भेज्या है। जिला री वीरांगनावां बहणां ने जिला कलेक्टर अर जनता रा नुमाइन्दा घरां पूगर संदेश पत्र अर दो हजार एक सौ रूप्या भेंट कर्या। जैसलमेर, भीलवाडा अर पाली जिला मांय भी शहीदां री वीरांगनावां ने नारियल अर शॉल ओढार 2 हजार 1 सौ रूप्या री राशि अर मुख्यमंत्री भजन लाल शर्मा री संदेश पानडी सूपी ज्यी।

000

प्रदेश मांय भारी बिरखा रो दौर थमबां रे पछे अबे हालात सुधरबा लाग्या है। आज बत्ती ठौड़ां माथे धूप खिली री अर मौसम सुहावणो रह्यो। पश्चिमी जिला मांय कुछेक ठौड़ां माथे काल रात हल्को मेह बरस्यो। लारला 24 घंटा मांय **पश्चिमी राजस्थान रा सम मांय सब ऊं बत्ती 8 सेंटीमीटर बिरखा दर्ज करी गयी। अठिने जैसलमेर रा चांधन मांय बत्तो पाणी पड़बा सुं टुट्या मकानां री पिछाण करी गयी। म्हाका खबरनवीस रे मुजब जिला प्रशासन निचला इलाकां सुं पाणी निकालबा मांय जुट्यो है।**

.....

हनुमानगढ़ जिला रा जान्या-मान्या भद्रकाली मिदर रे कने घघघर नदी रो पाणी पुळ रे बराबर आ ग्यो। इण ने देखता थकां प्रशासन पुळ माथे आबा जाबा माथे रोक लगा

दी। बीकानेर शहर मांय बारिश सुं जर्जर मकानां ने गिराबा खातर ज़िला प्रशासन मकान मालिकां ने नोटिस दियो है। नगर निगम शहर मांय इण भांत रा 90 मकानां री पिछाण करी है। वठिने बारां रा शाहाबाद हलका मांय तालाब री पाळ टूटबा सुं देवरी हलका रा केई गांवा पाणी मांय डूब गया। जिला प्रशासन गांवा वाळां ने भर्या पाणी री ठौड़ सुं दूर रहबा री सलाह दी है अर मौका माथे एनडीआरएफ री टीम तैनात करी गयी है। जयपुर ज़िला रा बस्सी हलका मांय हींगोनिया गौशाला रे कने ढूँढ नदी अर चाकसू हलका मांय पाणी मांय डूबर मर्या दो लोगां रा शवां ने एन.डी.आर.एफ. री टीम अर प्रशासन बारे काड लियो है। मौसम केन्द्र जयपुर रे मुजब कोटा, भरतपुर, अजमेर, उदयपुर, बीकानेर अर जोधपुर संभागां मांय काल कठे-कठे मेह बरस सके है।